

Falta mas investigacion y abogadonan kier scucha mas testigo

Caso di abuso sexual di polis femenino na Eagle Beach posponi

ORANJESTAD – Ambos homber D. y C., kendenan ta wordo sospecha di a abusa di un agente di Polis femenino, a presenta dilanti Hues ayera mainta.

Door cu ainda falta investigacion cu Instituto Forence na Hulanda (NFI) mester haci e caso tabata pro forma. Riba dje e abogadonan kier scucha testigo y Hues a honra un di e peticionnan cu ta indica cu lo bay scucha un testigo.

Investigacion forence

Den tribuna di sala di Corte tabata yen di familiaran di e sospechosonan. Hues a bisa e sospechosonan cu e caso ta pro forma pasobra ainda investigacion no ta completamente cla y no tin un proces-verbaal.

Fiscal a splica Hues cu Hues Comisario a habri e investigacion di nobo. A pidi un experto psicologo pa analisa e sanger di e victima. Ta asina cu tanto abogado mr. Illes y Fiscal kier scucha experto riba si e victima, lo por perde conocimiento y bolbe bin bij y bolbe perde conocimiento. Fiscal a splica cu door cu na Aruba no tin e experticio aki, e investigacion mester tuma luga na NFI na Hulanda. Fiscal a bisa tambe cu el a compronde cu di parti di sospechosonan kier scucha testigonan.

Scucha testigo

Abogado mr. Illes, cu a representa D., a bisa Hues cu e investigacion ta cla pero tin preguntanan manera Fiscal a bisa. El a bisa Hues cu lo kier sa kico tabatin den e sanger, alcohol of droga. Tambe kier sa con e cerebro di hende ta traha si tin e substancianan aki den curpa. Ta asina cu abogado kier scucha testigo. Hues a bisa cu a scucha un testigo caba cu tabata riba beach. Abogado mr. Illes a pidi pa scucha un ex amigo di e victima. Su argumento pa esaki ta cu e victima lo a bisa Recherche, cu nunca e lo tabatin atraccion pa hende homber, mientras cu e abogado kier muestra cu e ex amigo lo por duna claridad riba esaki.

Fiscal su reaccion riba e peticion di mr. Illes ta, cu e no ta haya cu tin motibo pa scucha e ex amigo. E no ta mira e necesidad pa scucha e testigo. E no ta haya cu tin relevancia den esaki. E no ta mira kico e testigo aki lo por bisa di loke a sosode riba Eagle Beach.

Hues su decision ta cu e si ta haya cu ta relevante pa scucha e testigo pa tin claridad den e declaracion di e victima.

Investigacion di NFI no completo

Mr. H. Croes a bisa Hues cu desde fin Januari 2015, e sospechoso C. ta cera. E ta haya cu mester haci investigacion debido. Fiscal a bisa cu ainda tin necesidad pa haci mas investigacion y mr. Croes ta comparti esaki. Sinembargo e abogado ta haya cu e informacion cu NFI a haci, a drenta algun dia pasa pero no ta completo.

El a splica Hues cu el a puntra un experto pa evalua e rapport di NFI y e experto a conclui cu e rapport no ta duna claridad fiho. Na opinion di mr. Croes, e tardanza den investigacion di e caso ta preocupante. E ta haya cu esaki ta bay hopi poco poco. El a remarca cu e victima cu na December 2014 a duna sanger y te ainda no tin resultado di test di sanger. E no a haya e resultado aki. E ta haya cu e preocupacion lo ta menos si e sospechosonan ta liber. Fiscal ta insisti pa e sospechosonan keda encarcela pendiente di e caso. Door cu Fiscal ta slow den investigacionnan ta crea un handicap y ta stroba den e caso.

No lo uza video di victima riba boto

El a bisa cu a tende e victima dilanti Hues Comisario y ta kere cu si scucha su ex amigo, lo bay haya sa si e lo papia e berdad. Mr. Croes a remarca cu Hues Comisario lamentablemente a laga sa cu e lo no scucha mas e victima como testigo. E abogado ta haya cu mester por laga yama e victima como testigo si ta haya necesario. El a pidi pa scucha tambe un amiga di

e victima, F., cu lo por conta mas di e comportacion di G. cu e victima. E abogado a bisa cu e presencia di F. lo por aclaria un video cu ta muestra e comportacion no nech di e victima riba un yate. Abogado mr. Croes ta haya cu e rapport NFI no ta cumpli cu tur e deseonan di Hues Comisario.

Fiscal a remarca cu abogado a bin cu asina storia largo pero no ta splica kico ta su deseonan. Fiscal a bisa cu falta mas investigacion NFI riba DNA di e sospechoso C. Esun di D. si a bay y a haya resultado caba. Fiscal a bisa cu e no ta mira motibo scucha F. El a bisa cu e no ta mira necesidad di uza e video di loke a sosode riba un boto. E no ta haya cu esaki tin nada di haci cu e caso di abuso sexual riba Eagle Beach.

No confia hues comisario

Hues a muestra cu for investigacion di NFI tin un DNA di un persona desconoci y awor cu tin esun di C., lo por trece claridad si e ta di C. of otro. Hues a bisa cu NFI tin biaha no ta bisa cu siguransa si ta tal persona a haci e delito.

Hues a conclui cu no ta necesario pa scucha e amiga F. El a ordena pa manda e caso bek pa Hues Comisario scucha e ex amigo y tambe pa mira si lo bay scucha e victima atrobe.

Abogado mr. Croes a remarca cu no ta un bon idea di Hues pa manda e caso bek pa Hues Comisario. Na opinion di e abogado, cu tur respet pa Hues Comisario, pero e ta haya cu Hues Comisario ta mira

mucho loke Fiscal ta desea y ta haya cu no ta imparcial. Pa mr. Croes, e expresion di Hues Comisario cu no lo bay scucha e victima atrobe, ta un señal bon cla. Hues a bisa mr. Croes, cu si e no ta haya cu e investigacion ta suficiente, e lo pidi mas. Fiscal tambe a bisa cu si e scucha G. y ta haya cu mester scucha e victima e lo pidi esaki tambe.

Sospechosonan ta keda encarcela

Abogado mr. v.d. Biezen tabata presente y ta representa e victima. El a bisa cu e victima no ta desea di ta presente. Hues a bisa cu lo pospone caso pa 11 September pa 8.30 di mainta.

Mr. Croes a pidi pa suspende e detencion di su cliente C. E ta haya cu prolongacion di detencion lo ta demasiado pisa. El a bisa Hues cu si determina cu no por prueba e acusacion, no mester laga su persona cera pasobra esaki ta perhudica e cliente.

Na opinion di mr. Croes, e sospechoso C. a perde oportunidad di ta hunga futbol profesional. El a menciona sentencia di Corte na Hulanda, caminda a duna sentencia na favor di sospechoso. E ta kere cu mesun cos lo bay pasa cu su cliente. E abogado a bisa Hues cu e caso por bay na banda di Fiscal of na banda di e sospechoso. Pa despues demanda daño perhudicio, esey no tin validez. El a pidi Hues pa suspende e detencion di e sospechoso pendiente di e caso penal.

Fiscal a reacciona cu tin mo-

tibo di peso. Fiscal a bisa Hues cu e no ta kere cu lo tin chens grandi cu e sospechoso lo wordo declara liber. El a reacciona cu e caso cu e abogado ta menciona ta otro, cu e caso aki.

Den e caso aki, e victima a wordo haya for di tino sunu ariba Eagle Beach y na hospital el a recobra conocimiento. Fiscal no ta haya cu e interes personal di e sospechoso, pa hunga futbol profesional, ta pisa mas cu e interes di e caso penal. El a pidi Hues pa rechasa e peticion. El a bisa tambe cu ainda falta pa scucha testigo y no ta bon pa laga e sospechoso liber.

Hues a bisa cu pa awor e mester wak si tin suficiente indicacion contra e sospechoso. Hues a splica cu ta ora di tratamiento di e caso ta bay mira si tin prueba of no. Hues ta haya cu for di e informacionnan cu tin para riba e documentonan, esta declaracion di testigonan y e otro sospechoso, tin indicacion contra C. Hues ta haya cu mirando cu ta bay scucha testigo, no kier pa influencia e testigo. Ademas comunidad lo no compronde cu ta laga e sospechoso liber.

Hues no ta haya cu e interes personal pa futbol profesional ta pisa mas cu e interes di e caso penal. El a rechasa e peticion y cu C. lo mester keda encarcela te dia di e caso na September 2015. C. a reclama cu asina su futuro ta bay perdi. Hues a bisa cu lo bay scucha tur cos durante tratamiento di e caso y e ora ey lo bay mira si tin prueba of no. □